

lis Gnovis

■ **RIVOLT.** Testemoneance noviolente

Di sabide ai 2 di Otubar, la storiche manifestazion cuintri dai pericui, dai incuinaments e des strassariis ch'a menacin di di e di gnot il Friûl di Mieç e cuintri de reclam militariste popolarizade des «Frecis tricolors» e torne tal orari 14-15 di ogni prime sabide dal mês, devant dal ristiel de sclavitùt militâr di Rivolt. L'organizazion e je curade dal grop «No Amx Pàs» che, te sò pagjine «Facebook» (https://m.facebook.com/No-Amx-Pàs-685821301518460/events/?ref=page_internal&mt_nav=0), al propon un coment critic su lis manifestazions pal inovâl de squadre acrobatiche da l'Aeronautiche taliane dai 18 e dai 19 di Setembar.

■ **SPILIMBERC.** Ritrats americans

La colezion di mosaics dedicâts dai arlêfs de «Scuele Mosaiciscj dal Friûl» ai plui grancj personaçs dal mont dal spetacul, te suaze dal concurs «Mosaic Young Talent», e à permetût di imbastî dôs mostris che si po visitâ tai Stâts Unîts, vie pe Sierade. La prime, «50 faces: Italian Mosaics from the Scuola Mosaicisti del Friuli» e restarà vierte fintremai ai 7 di Otubar, li dal Centri culturâl Muckenthaler di Fullerton, te Californie. La seconde si podarà rimirâle insin ai 7 di Novembar, li dal «Marin Moca-Museum of contemporary art» di Novato, cul titul «Italian American Icons: mosaic portraits». Lis esposizions a son curadis di Guglielmo Zanette, diretôr artistic de clape culturâl «Naonis», che dal 2016 e cure il premi «Mosaic Young Talent».

■ **UDIN.** Marcjât dal lavôr e svilup de montagne

Par onorâ il so fondadôr, Domenico Tranquilli, l'istitut pes ricercjis economicis e sociâls «Ires Fvg» al à imaneât la seconde edizion dal premi par tesis di laureade dedicadis a l'economie, al svilup de montagne e al marcjât dal lavôr, in Friûl e a Triest. Lis domandis di partecipazion a varan di jessi consegnadis drenti dai 7 di Zenâr dal 2022. Tal lûc internet di «Ires», si cjate ogni informazion necessarie e il modul pe domande (www.iresfvg.org). Il premi al smire di valorizâ i studis ch'a proponin dâts e ideis originâls sul cont dal svilup regionâl.

■ **TUMIEÇ.** Un laboratori cun Maman!

Ai 8 di Otubar, e tache la seste stagion de trasmission televisive par fruts «Maman!». La coproduzion di «Telefriuli» (canâl 11 dal digjitâl terestri) e di «ARLeF» e propon esperiencis ludichis e educativis pai fruts de scuele de infanzie e primarie, metint in contat canais e fameis cul plurilinguism. Une cercje dal program e je stade ufierte ai 25 di Setembar, a Tumieç, intant de «Festa della Mela», dulà che Daria Miani e à imaneât il laboratori «Cjantâ e zuiâ cun Maman!».

Miercus 29	Ss. Arcagnui G.M.R.	Domenie 3	S. Gjerart
Joibe 30	S. Jaroni	Lunis 4	S. Francesc di A.
Vinars 1	S. Taresie di L.	Martars 5	S. Luis Scrosop
Sabide 2	Ss. Agnui custodis	Il timp	Zornadis clipis.



Il soreli
Ai 29 al iève aes 7.03
e al va a mont aes 18.51.



La lune
Ai 6 Lune gnove.

Il proverbi
Scomence, che dopo
ogni sant al jude.

Lis voris dal mês
Otubar al segne cuasi dal dut la fin de racuelte
dai prodots tal nestri ort.

L'uniche riprese vere

«O vin dome chest mont
e o vin di tignîlu cont
cun amôr»

Ason 17 lis zornadis dal «Festival dal svilup sostenibil», ch'al torne cun centenârs di apontaments e di ocasions di confront e di riflession dai 28 di Setembar ai 14 di Otubar, propit par vie che 17 a son ancje i Obietifs/Goals de «Agjende 2030 dal svilup sostenibil».

Prin ancjemò dal «NextGenerationEu» e dal «Pnrr», chel document, fat bon a l'unanimitât da lis Nazions unidis ai 25 di Setembar dal 2015, al mostre la strade che ogni Comunità e ogni Pais a scuegnin par fuarce percorsi s'a vuelin trasformâ il mont, in mût che svilup economic, inclusion sociâl e protezion dal ambient no sedin un a discapit di chel altri e par no che i mieçs e i vantaçs a disposizion di une part de Umanitât no sedin dineâts a la plui part dai abitants dal Marimont dal di di vuê e des etis avignî.

Il Festival, ch'al rive a la cuinte edizion, al è coordinât de Aleance pal svilup sostenibil «Asvis», ch'è je une rêt di passe 300 organizacions de Societât civil. In zornade di vuê, fra i apontaments publics e chei «on line», fra lis convignis inmaneadis in mût diret, chês cuntun respîr statâl e chês regionâls e locâls, il lunari de rassegne al propon passe 500 iniziativa. Tal calendari, a son notâts i confronts e i dibatiments, ma ancje presentazions di libris, mostris, proiezioni di cines e «flash mob», par condividi pinsîrs ma ancje par realizâ azions.



Un dai placats ch'a popolarizin il «Festival dal svilup sostenibil»

Fint ai 14 di Otubar al torne, ator pe Italie, il «Festival dal svilup sostenibil»

A la direzion <https://festivalsvilupposostenibile.it/2021/tutti-gli-eventi/>, si pues lei i apontaments programâts ator vie pe Patrie, dulà ch'a spichin chei proponûts de Universitât furlane, te suaze dal progjet «Per un domani sostenibile». Fra lis vilis nostranis ingaiadis tal «Festival», a jentrin Aquilee, Cividât, Cjanive, Gurize, Palme, Sacil, Tumieç e Udin. «Il Festival al sarà la plui grande mobilitazion popolâr su lis tematicis ambientâls e dal svilup sostenibil – e à declarât ai 23 di Setembar la presidente di «Asvis», Marcella Mallen, presentant la rassegne –. O vin fat un invît e la

rispuete e je stade plui grande di ogni nestri desideri. Lis tematicis leadis cul svilup sostenibil a son aromai un patrimoni cetant condividût. Si à pardabon capît e simpri plui si è daûr a capî ch'ò vin dome chest mont e ch'ò vin di tignîlu cont cun gracie. La Societât civil e intint di jessi protagoniste dal so avignî. Une vore di apontaments a podaran jessi seguîts cjase sò, in gracie des «diretis streaming», proponudis dai cjanâi «digital» e «social» dal Festival e di «ASviS» (festivalsvilupposostenibile.it/asvis.it).

Mario Zili

La disfide de solidarietât e de pâs, a Padue

In chês stessis zornadis dal «Festival dal svilup sostenibil», Padue i da acet a «Solidaria», il festival de solidarietât, imbastît di «Csv». Passe 40 iniziativa a saran programadis dai 27 di Setembar ai 3 di Otubar, seont il lunari proferît tal lûc www.solidaria.eu. Intant de rassegne, si presenterà il spetacul «La Croce», ispirât dal poete Giovanni Raboni, e lis guidis «Guida Globale alla Pace per Amministratori coraggiosi e Non» e «Ma che discorsi!? Per una Cultura della Pace alternativa ai discorsi d'odio».

Arlef. I Comuns a podaran sostituî i cartei stradâi monolengâi Segnaletiche bilengâl, bant di 750 mil euros

La cifre di 750 mil euros e je a disposizion pal gnûf bant de Agenzie Regionâl pe Lenghe Furlane – ARLeF, finanziât ancje dal Assessorât regionâl aes infrastruturis e teritori, par comprâ e par instalâ la segnaletiche vertical bilengâl talian-furlan su la fonde des normis pe tutele de lenghe furlane. I beneficiaris dai contribûts a son i ents locâi che a operin tal teritori di lenghe furlane, daûr di ce che al specifiche l'articul 5 de leç regionâl 15/96. Il regolament, il bant e il modul di domande si cjatin sul sît www.arlef.it. Midiant di chescj contribûts, lis Amministrazioni a podaran sostituî i cartei stradâi monolengâi cun chei bilengâi, daûr di ce che e previôt la leç regionâl; o pûr a podaran sostituî i cartei bilengâi che no

son conformis al Codiç de Strade. Dopo vè jemplât e firmât in forme digjitâl il modul di domande di contribût, si podarà presentâlu dai 24 di Setembar aes 10 dai 25 di Otubar dal 2021, dome cuntune PEC ae direzion arlef@certgov.fvg.it. I Comuns a podaran partecipâ sedi in forme individuâl che tes formis associativis previodudis dal ordenament. Il contribût al sarà concedût drenti di sessante dis de presentazion de domande, daûr de procedure a sportel, intal limit des risorsis a disposizion. Par chest, a 'nt podaran gjoldi dome i ents locâi che a varan presentât domande par prins. La dirigenca de ARLeF e à pandût la sò sodisfazion par une iniziative che di une bande e puartarâ a regolarizâ la segnaletiche stradâl che e esist za, e di chê altre e varâ efets impuartants



ancje a nivel economic pes aziendis dal setôr che a lavorin sul nestri teritori, dopo cuasi doi agns di dificoltàs puartadis de pandemie.